

中华传世文选

任继愈 主编



中华传世文选

任继愈 主编

宋文鉴(下)

[宋]

吕祖谦 编

吉林人民出版社

(吉)新登字 01 号

中华传世文选

主 编	任继愈			
责任编辑	李书源	李彦珍	封面设计	尹怀远
责任校对	张晓斌	李宏玉	版式设计	周书彦

出 版 者	吉林人民出版社 (长春市人民大街 124 号 邮编 130021)
发 行 者	吉林人民出版社
制 版	吉林人民出版社激光照排中心
印 刷 者	长春新华印刷厂

开 本	787×1092	1/16
印 张	1120	插页 136
字 数	28000	千字
版 次	1998 年 10 月	第 1 版
印 次	1998 年 10 月	第 1 次印刷
印 数	1—5 000	套

标准书号	ISBN 7-206-03015-7/1·140
定 价	3 600.00 元(全 20 册)

如图书有印装质量问题,请与承印工厂联系。

宋文鉴卷第六十七

表

谢南郊加恩表

王 珪

奉二精之报，方错事于崇丘；猎三灵之流，遂均厘于迹辅。仰承嘉命，俯惕孤衷。伏念臣早会昌期，进闻国论。器虽狭于所用，志常勇于有为。属修郊庙之祠，叨与公卿之议。鸣钟在虞，获际灵旂之娱；紓佩扫途，亲承天步之恪。曾乏秉文之助，得观继圣之能。逮敷锡于鸿休，复过膺于宠数。论非朝允，恩实天隆。兹盖伏遇皇帝陛下，文辑阔希，仁渐疏逖。因神推惠，既被虫鱼之丰，为已掠功，何胜渊谷之畏！尚勉殚于朴守，期少谢于曲成。

请皇帝罢谒太庙表

王 珪

近尝拜章，以大庆殿将行恭谢天地之礼，乞罢前一日谒太庙者。伏以升燎于坛，即节徂郊之礼；奉璋于室，宜财假庙之文。俞音未回，群听犹郁。恭惟尊号皇帝陛下，膺纯耀之烈，抚休明之期。盖神劳万务，则气或盭和；以德交三灵，则福亦旋感。念保綏于鸿业，思昭谢于高穹。乃涓路寝之居，以象圆丘之飨。粢盛芳洁，璧玉华光。方将陟配三后之灵，导迎上帝之贶。兹诚为人子者孝之尽，有天下者报之隆。今复驰齐蹕之严，祇太室之荐。窃恐雾露之气，涉于宵衣；舆马之音，震乎天步。则非所以承祖宗之受，来邦家之休。臣等冒秉化钧，获司熙典，谓文之所损，在于适时之变。且事不敢勉，诚以爱君之深。冀不并侑之虔，愿弭先期之谒。倘孚众欲，是契天心！

谢赐生日礼物生饩表

王 珪

诏函俯暨，台馈申颁。绝衡弼之异恩，动里闾之殊观。伏念臣所怀蹇浅，自奋羈单。方少而孤，每感劬劳之日；其生也幸，得遭熙盛之朝。遂以区区投老之身，而处赫赫具瞻之地。与图邦政，图无经远之谋；式燕私门，更误养贤之礼。此盖伏遇皇帝陛下，宠綏近辟，丕冒庶工。谓君臣同体，则忧乐宜均，而上下相

求，则报施为重。帀增实筐，宠已厚于解衣；饩稟盈庭，愧有加于浮食。敢不内竭朴愚之守，上酬奖顾之深！

谢赐生日礼物表

王 珪

圣言如綍，有温厚于芝函；邦锡自天，发光华于葩室。荣谕素望，愧溢常涯。伏念臣以固陋之资，被睿神之眷，乃预尘于政路，复冠列于台司。岁月峥嵘而屡更，精力勤劳而莫补。速讥谗于众口，愧功烈于前人。逮兹苟完，安有横冀？载及桑蓬之序，方深蛄蝼之思。念莫报于劬劳，敢饗承于恩礼？良金烛乘，严宝勒于天驹；藻帛绚文，杂华章于笥服。岂繄藩庶，并及衰迟！此盖伏遇皇帝陛下，敦舜孝以仪民，軫尧仁而冒物。特厚柄臣之遇，过颁御府之珍，交孚曲记于贱生，博爱乃容于滥赐。拜汉庭之宠，虽惭稽古之工；报《周雅》之章，愿上如冈之寿。

越州谢上表

沈文通

以亲为请，得郡甚优。越去宫庭，介居江海。就职之始，抚心弗宁。伏念臣本诸生，知守前绪，亲逢文治之盛，冒尘科选之荣。擢跻儒林，遂执史笔。学不足以达治乱，于顾问实难。文不能以通古今，于述作何有？误出圣朝之遇，进登侍从之途。龟勉备官，逡巡待罪。虽大恩未报，岂敢便安其身；顾私养弗充，不胜进退之迫。辄以诚乞，就兹莫居。幸溢于涯，感无以喻。此盖伏遇尊呈皇帝陛下，天地之德，覆载而无所不容；日月之明，照临而无所不暨。故臣得遂其犬马之志，安于藩翰之间。况兹为州，自昔建国，连带数郡之广，总齐万兵之权。有可以为，当无所苟。尚宽东顾之虑，少获万分之心！

越州谢上表

元 绛

易帅峤南，方深危惧；分符浙右，特荷保全。仰服恩章，惟知感涕。伏念臣习知忠谊，窃慕功名。历事三朝，行将四纪。向自北垂之漕，就更南粤之麾。蒙临遣以丁宁，敢遑安而留滞！载驱长陆，甫及半途，忽闻羽檄之音，谓有龙编之警。横水明光之甲，得自虚声；云中赤白之囊，倡为危事。边萌扰动，朝听震惊。况在乎守臣，敢愆奔命。风驰南海，已久见于吏民；日远长安，盖未闻于章奏。仰烦宵旰，咨及臣邻。谓护塞之急人，且择才而代戍。驱车万里，虚出玉关

之门；乘驷一麾，幸至会稽之邸。尚兼方面，弥畏人言。此盖伏遇陛下，法道曲全，等天丕冒。以臣更事绵久，备历四方之勤；知臣立朝最孤，迥无一介之助。涣然休命，付畀价藩。臣敢不训旅以严，安民以静？庶希乐易之治，仰补熙隆之时。衔赐不赀，论生曷补！

谢致仕表

元 绛

四载披诚，薪还于朝组；九重垂听，申锡于诏函。预储官之备官，遂家林之佚老。伏念臣衣纓衰绪，樗栎下材。再觔而孤，仅能构思；未冠而仕，始务代耕。懵儒术之逢原，狙吏文之宿业。历官三世，服劳四方。蒙上圣之误知，自东州而即召，擢置词禁，进处冬官。浸膺选众之求，窃贰赞元之任。近藩出守，遇潜邸之建旆；别殿追还，复露门之奉席。遽周岁律，屡对威颜。自惟癯朽之余，每循止足之戒。深辞圭绂，冀就田庐。戡齿孤鸣，空怀疲恋；槁骸如在，正欲全归。仰烦睿训之慈，终窃愚衷之守。不图宠眷，加进荣阶。存东宫保养之官，仍西清严近之职。效华封之祝子，仁见多男；阶商皓之通宾，愿护太子。恩隆山岳，感浹肺肝。此盖伏遇皇帝陛下，大道曲全，至仁博施。念师丹之垂老，久已宣勤；察卫绾之无他，居常远耻。越推渥渥，获保初终。侘里俗而有辉，顾师言而至愧。冥鸿虽远，正依天宇之函容；时藿未凋，尚素日华之明润。逢辰知幸，之死不忘。

定州谢上表

吕公著

尸荣右府，无裨庙算之奇；假守中山，复当阃制之重。戴恩为惧，虔命以行。遄届郡封，恪宣条诏。伏念臣降才溷薄，植性懦弱。学术不足稽五谋之疑，识虑不足以筹千里之胜。特以百年旧族，荷累圣不赀之恩；一介微躯，辱上主非常之遇。寅缘宠渥，更践清华。晚收疏外之孤踪，擢赞微几之要务。奉天光而咫尺，被圣海之叮咛。谓臣出服近僚，有均休共戚之义。察臣傍无厚援，绝背公死党之嫌。曲示优容，俾思报效。顾弩铅之难强，嗟蒲柳之易衰。久预枋司，积有妨贤之畏；浣祈麾寄，更图陈力之方。伏遇皇帝陛下，体虚静以储神，极高明而尽下，俯矜素悃，特霁俞音。惟定武之奥区，据朔陲之重地，尚叨付委，靡即弃捐。仍进叙于文阶，且兼华于秘殿。并将厚意，增贲旧臣。况臣夙侍轩墀，实司枢筦。凡治军经武之要，泊守塞御戎之宜，日炙睿谋，备观宸断，逮兹临遣，得以遵承。谨当细大必躬，夙宵弥励。进不敢希功而生事，退不敢弛备以旷官。期

不玷于误知，庶少酬于鸿施！

河阳谢上表

冯 京

久尘右地，无补圣明；坐窃迹藩，尚宽罪戾。恩私溢望，愧灼兼怀。伏念臣才不逮中，智非经远，特逢盛际，再列近司。擢之于寻常之中，振之于颠危之下。便蕃异数，究极宠光。龔龔备员，仅能寡过；碌碌成事，无足论功。徒肩许国之诚，靡讲卫生之术。曩婴疾疹，殆至膏肓，虽赖上医，迄存余喘。然而气血潜耗，智虑早衰，筋力乏于步趋，耳目乖于听览。勉从职事，仍历岁时。覆餗之讥，已腾众口；乞麾之请，遽侧上心。矧惟右辅名都，三城重镇。水陆皆便，次舍非遥；食物具宜，堂皇尤峻。使传罕经于馆侯，讼牒希至于庭除。加以时雨既优，宿麦滋茂，盗贼屏息，闾里阜安。不烦施为，有便颐养。此盖伏遇皇帝陛下，天地容覆，日月照临。私臣以不报之恩，谅臣有可矜之理。终始眷遇，进退保全。顾何心颜，敢爱驱命？惟愿稍加药餌，益近方书。朝露未晞，倘复还于旧观；燭火不息，誓更竭于精神。

贺熙宁十年南郊礼毕大赦表

曾 巩

人之所归者莫如德，天之所享者在于诚。其惟圣王，克有全美。伏惟皇帝陛下，聪明稽古，承继祖宗，慈惠爱人，抚临邦国。有遍覆并容之大度，有防微慎独之小心。不从游畋，不近声色。无纷华盛丽之好，无便僻侧媚之私。岁时吉蠲，以承七庙；左右顺适，以奉两宫。其功施于人，效见于事，则宅仁由义，缙绅之徒成材于学校；超距蹋鞠，熊罢之旅养勇于营屯。瓠窋污邪之收，充于仓廩；关石和钧之利，阜于市廛。家有豫乐之声，人无愁怨之色。协气所召，休应自殊。钩陈太微，星纬咸若。昆仑渤澥，涛波不惊。近则金石之音，鸟兽欣跃；远则干羽之舞，蛮夷骏奔。象齿旅于阙庭，龙媒纳于闲厩。是谓六府三事，皆可以歌；四海九州，罔不率俾。盖巍巍而特起，非琐琐之能窥。前世议泰山之封，谋梁父之禅者，度崇比大，畴克登兹？陛下抑而不图，谦以自牧。以谓先后创业垂统，其功莫得而名；上帝隤祉发祥，其德无可以称。思所以报，一本于心。故寅畏严恭，积之有素，而齐明薰苾，进而益虔。在于物者，不取其烦；尽诸己者，必求其实。是以萧光之烈，奏于宗祊；柴燎之蒸，焜于郊兆。幽隐昭答，神灵顾怀。无疆惟休，方浸昌于万世；不敢专享，故敷锡于群元。参稽典彝，定著赦令，弛张从理，同异称情。蠲罪眚而弃瑕疵，录劳能而纵逋负。显晦咸暨，洪

纤不遗。万国之欢，既交于冲漠；一人之庆，遂及于跂蠕。孚于上下之间，极乎帝王之盛。臣被学最旧，蒙恩浸深。莫侍甘泉之祠，独叹周南之滞。第从臣之嘉颂，未效薄材；望属车之清尘，但驰远思。

谢元丰元年历日表

曾 巩

一远阙庭，十移星历。顾凋零于齿发，无报补于毫分。伏惟皇帝陛下，叙大禹之九畴，齐有虞之七政。阴阳寒暑，罔不若时；草木昆虫，举皆遂性。循用颁正之典，宠诒分土之官。臣幸备守藩，预闻告朔。去亲方远，已惊岁月之新；许国虽坚，更叹功名之晚。惟体在民之意，庶裨及物之仁！

谢翰林侍读学士表

范 镇

省中四禁，忘误其一，苟或有犯，加罪不原。猥蒙贷全，犹藉亲近，内自循省，以荣为忧。窃以赏而受赏者，若固有之，善赏也；罚而被罚者，知自取之，善罚也。成王举鲁七百里之地以封周公，周公拜于前，鲁公拜于后，而不以为泰者，功所当也。管仲夺伯氏骍邑三百，没齿无怨言者，罪所宜也。伏惟皇帝陛下，录社稷之功，而赏加辅臣；重书诏之失，而罚及学士。赏所当赏，罚所当罚，明命一出，中外耸然。因使天下之人，晓然知先帝与子之明，而群臣得君之庆。臣于此时，死固无憾。况蒙再造使之更生者乎？重念臣出乎远方，孤陋朴拙。臣子忠义，则尝讲闻；朝廷典章，实匪练习。果缘所短，有玷斯猷，不加萧斧之诛，乃换金华之职。虽云薄责，足警群伦。且天地大恩，固无论报之理；而冰霜素节，犹有持守之常。愿坚初心，以收来效。

谢致仕表

范 镇

早衰多病，得谢归休。有命自天，所容如地。仰銜恩纪，伏窃兢荣。伏念臣本出孤生，历尘朏仕，曾无报效，虚积岁时。仕宦之年，已更一世；遭逢之幸，实事三朝。徒有愚忠，以自信处。虽曰乞身而去，敢忘忧国之心？因叙人言，上干天听，曲蒙宽贷，未赐诛夷。得于盛明之时，以遂闲适之性。伏惟皇帝陛下，审持赏罚，而一委于公；总秉权纲，而不放于下。集群议为耳目，以除壅蔽之奸；任老成为腹心，以养和平之福。跻民富寿，措国康宁。臣之至情，实在于此。

谢龙图阁直学士表

宋敏求

推宸扆之误恩，备禁途之常从，闻命荣抃，省躬兢惶。伏念臣性理蠢冥，局致庸近，猥缘承学之旧，浸沐右文之风。英宗皇帝，拔自书林，置于词掖。虽汲黯早进，谬旅于隼游；而萧育稀迁，自安于拙分。一叨奖拔，星纪仅周。固尝励翼其心，靖共所守。顾命义以弗苟，务忱恂而匪他。以至陟谏臣之坡，司史氏之笔，还儒馆而尘丽正之职，分使节而赞甘泉之仪。益欣圣旦之亲逢，莫匪台家之茂选。而曲绥皇眷，冒进荣阶。谓臣尝事先朝，典右曹之缙绅，俾臣特升廷阁，直西序之图书。抚弃迹以重收，帖宠名而差叙。带环申锡，诏检垂褒。此盖伏遇皇帝陛下，权纲大新，恩断中出。均天地之平施，煦及陈荑；回日月之余光，丰于蔀室。致兹窳器，亦预清班。敢不慎服官箴，勤殚忠蕴，庶图来效，少报洪私。

安州谢上表

滕甫

屡致人言，固宜窜殒；曲蒙天造，尚赐保全。虽易守符，仍叨善地。士民纯秀，几同广鲁之流风；里俗欢康，正值元丰之乐岁。安闲事简，尸素为惭。伏念臣本以愚儒，出逢真圣。首蒙国土之遇，最在众人之先。便欲碎首以酬恩，未知死所，故尝指心而自誓，惟有天知。况事任既已遍更，在人情宁不爱惜，岂有固为缓纵，自取颠跻？惟日月之至明，亮肺肝而必照。矜怜旧物，收置近藩。而朝廷难废于公言，故君父特存于大体。稍从远外，终不弃捐。顾臣何人，受恩若此！此盖伏遇皇帝陛下，神圣遍物，清明在躬。化覃无外之封疆，仁及何知之草木。况臣累更器使，粗效愚衷。眷此遗簪，尝辱提携之末；譬之行苇，更收践履之余。臣敢不祇奉简书，服勤吏役？虽桑榆之旻景，将逼暮年；而犬马之微诚，犹思后效。

谢澶州签判表

程颢

论议无补，职业不修，国有典刑，罪在诛戮。曲蒙宏贷，仰荷洪私，期于糜捐，莫可报谢。臣性质朴鲁，学术空虚，志意粗修，智识无取。陛下讲图大政，博谋群材，过听侍臣之言，猥加风宪之任。臣既遭遇明圣，亦思誓竭疲弩，惟知直道以事君，岂忍曲学而阿世。屡进阔疏之论，愧非击搏之才。徒尝剝沥肺肝，

曾无裨补毫发。既不能绳愆纠谬，固不愿沽直买名。岂敢冒宠以居，惟是奉身而退。自劾之章继上，阖门之请深坚。天意未回，宪章尚屈，更奉发中之诏，俾分提宪之权。不惟沮争论之风，亦惧废赏刑之实。力形奏述，恭俟诛夷。此盖伏遇皇帝陛下，极天清明，普日临照。洞正邪之心迹，辨真伪于幽微。察臣忠诚，恕臣狂直，不忍置诸重辟，投之远荒。解其察视之官，处以便安之地。生成之赐，义固等于乾坤；涵容之恩，重益逾于山岳。臣敢不日新素学，力蹈所知，秉心不回，信道愈笃。愿徇小夫之志，不为儒者之羞。或能自进于寻常，庶可仰酬于万一。

代谢进和御诗奖谕表

强 至

参群篇而奏御，赓载非工；被优诏之发中，褒嘉甚渥。惕然拜君父之赐，藏以为子孙之荣。伏以《书》曰“帝庸作歌”，所以极道明良之意。《雅》云“臣能归美”，所以上酬福禄之辞。惟千载一时之逢，逾三王二帝之际。乘太平之多暇，讲稀阔之盛游。历宝宇以披祖宗相受之文，御飞帚以纵神圣有余之学。以至置酒别殿，赋诗中宸。于时从联，咸续睿唱。如臣者，有朴愚而植性，无文采以表身。自陪风宪之要司，都废雅言之旧学。妄挾鄙思，缀成斐章。大乐在前，发哇声而接响；太阳临下，炫燭火以交光。既黻邃旒，若临深谷。敢谓兼容之度，例形过奖之辞。游圣门者，谓之难言，矧继尧文之后。逾华袞者，重夫褒字，矧蒙汉训之加？夫何孤臣，窃此厚幸。此盖伏遇尊号皇帝陛下，齐德乾覆，育材士伦。善虽小而弗遗，力或矜其不逮。誓竭讲劄之效，庶酬假勛之仁。

代都运赵待制谢上表

强 至

小材而临大计，不知经画之所；从薄量以函厚恩，唯有思勤而可补。窃以今之北道，重曰外台，边宿劲兵，境控强虏。岁支洪河之备，而民力几屈，所以艰于赋输。地列数镇之师，而吏员益繁，所以要在刺举。宜择精明强济之器，以付转给澄清之权。若臣空孱，于事迂拙。曷引两川之漕，近贰大农之司。率隳竭于愚衷，讫罕通于利术。敢期烦使，乃委孤臣？此盖伏遇皇帝陛下，廓天地之容，收涓埃之细，特加不次之命，而欲劝来者。弗责已试之效，而俾怀后图。得不夙夜以思，始终乃职。岂敢颛聚敛之最，以上累于君仁。亦当拊凋残之余，庶下苏于民瘼。

代谢再任表

强 至

惆怅累陈，从欲许还于新节；衰疲自力，竭能勉抚于旧封。委寄逾隆，颠隮自惧。伏念臣本缘一介之曲学，力被三朝之误知。自解宰钩，继纆守绂。早年遇事，风霜不计于残躯；晚岁缠疴，药餌乃同于常膳。比引揣躬之分，数裁辞剧之章，力丐闲州，少安病质。而恩生望外，事与愿违。俄更西雍之师旄，仍付北门之留钥，所以极陈去就，仰黜聪明。幸宠利非事君之宜，必冀寝加恩之命。策疲弩虽老臣可强，敢不拜再任之休。讫奉俞音，两谐愚恳。此盖伏遇皇帝陛下，至仁天冒，盛德海函，器使庶工，爱遍旧物。虽俊杰甚众，并试有为之时；而阘瘁之余，惜投无用之地。敢不勤宣条教，兼拊兵民。倘沟壑之未填，尚乾坤之可报。

宋文鉴卷第六十八

表

淮南转运使谢上表

苏 颂

赞画甘泉，久玷三台之末；观风淮甸，骤升数使之荣。朝寄匪轻，地望兼重。愧非才选，靡称厥官。姑谨诏期，趣行所部。宠灵所被，畏惕非常。窃以州郡备官。

所以分厘于民务。朝廷遣使，所以布宣于主恩。付一道之事权，用六条而举察。赋舆出内，俾以均输；吏治否臧，责之荐黜。自匪绵更于事任，詎能振肃于治纲？

若臣者，才不足以适时，虑不足以经远。偶缘资级之例，得从选用之阶。始自书坊，出分使竹。俄从襁服，入佐计筹。粗收岁月之劳，蔑著毫分之效。岂谓伏遇皇帝陛下，察庶工之任使，矜久职之良勤，拔于省僚，授以利柄。矧惟清海之部，实扼东南之冲。

昔号奥区，今逢乐岁。五稼盈畴而遂茂，四人勤力以厚生。料乎漕运之程，无烦趣办之急。惟当敷宣惠泽，通究物情。编齐之利病可更，立求其本；刑政之重轻或失，当适其中。止期靖嘉，少称论择。若乃事体貌以为风采，尽铢两以敛民财，顾在懦愚，诚多阔略。重念上慈天覆，圣治日新，官无内外之殊，事悉忧勤之系。昨臣受任之始，获面于清光；陛下临遣之言，曲加于勉谕。自省最为于疏远，何图亦记于渊衷！岂非以委任之优，故特示拊循之厚。虽乾坤平施，非报谢之可言；而犬马微生，第勤劳而思奋。悦驱驰之有用，期终始以无逾。

右仆射待罪表

苏 颂

圣恩深厚，仰戴曷胜；孤迹兢危，彷徨靡所。切以宰辅大任，表率百官。人望所归，则论议行而必信；物情不与，则名器轻而易摇。而臣猥以朴愚，误蒙任使。上不能谟明国体，以熙庶工。下不能甄别人材，以协众望。误朝有谴，擢发宁穷，致招人言，上黷天听。名一挂于白简，罪当置于丹书。虽二圣覆之如天，未令投迹于四裔，而群言谓其失职，岂宜包羞于近班？是以屡贡封章，冒尘旒

纡。再纡中札，曲谕宸衷。捧诏惊惶，重自思省。本欲便祈于归老，属兹方负于罪辜，僥布恳诚，惧为僭越。在臣进退之分，敢计重轻？于国废置之间，实关劝沮。伏望太皇太后陛下，皇帝陛下，矜怜甚憊，本无它肠，案举严科，亟行幽黜。一则安全于介拙，尚保余生。一则厌息于烦言，遂清朝路。

衡州盐仓谢上表

刘 攽

议令献言，知典刑之无赦；原心观过，荷仁圣之有容。贷其余生，处以善地。伏念臣稟生艰拙，遭世盛明。学不能穷理而知几，材不足趣时而适变。晞名途以旅进，滥文馆之末游。和铅何功，索米逾岁。间承人乏，偶摄掾于中堂；旋误圣知，使备员于宪府。仍职书林之旧，就行御史之中。始自愚臣，前无故事。方陛下继承于五圣，而国朝平治者百年。力勤肯获之田，大解不调之瑟。搜拔群材而审以器使，变化百度而旷然日新。臣于此时，职在言路，誓殚忠义，敢避势权！宁以孤睽讦切，拂众而危身，不忍从容唱和，负恩而速进。狂愚自信，裨益无方。故宿官之日几何，而瞽言之罪非一。至如均民而弛役，因之率户而出泉。虽虑始乐成者，愚人之不知；然损下益上者，先王之大戒。辄条十害，冀补万分。议臣见讥，以为败谋而乱化；清衷独见，知其有责而尽言。不徇以诛，止容其去。橐台阁之二职，置潇湘之一涯。有禄食使之存全，有职事可以报效。衔恩载幸，揣分增忧。此盖伏遇皇帝陛下，察臣孤忠，全国大体。不惜骖一夫之法，庶几留众正之门。谨当上体恩仁，期于必报；下坚节义，死而不渝。

谢青州到任表

刘 攽

东方大国，莫如郛青，愚臣何人，继命帅守。莅官兹始，揣已不遑。伏念臣器蕴至疏，智灵弗竞。遭会继明之始，越膺共政之图。三府空逮于六朝，千虑蔑闻于一得。虽进退必由其道，常愿学乎圣人，而功烈如此其卑，终难收于士论。宽典刑于司败，假丘垅之便藩。报政稽期，实愧三年之鲁；改符易地，犹叨四履之齐。惟时东秦，号一都会。士知礼义，境控海山。厥民富饶，少敝攘之旧习；其俗舒缓，有平易之余风。谨于承流，可以无事。曾是迂愚之品，获尘寄委之优。此盖伏遇皇帝陛下，乾健而粹纯，丰中而光大。沉几以通变化，定鉴以御妍媸。人无遐遗，材以器使。臣敢不振厉衰境，激昂至恩？简礼去烦，稍究前修之治；推仁宣泽，庶求远俗之安。倘集涓微，仰酬覆帔。

知亳州谢上表

刘 攽

齿发衰暮，藩镇会繁，据非所安，荣以为惧。昔者圣门高第，方六七十则所愿为。汉世诸儒，至二千石谓之达官。盖量力审己，虽小邦实曰才难；逢辰慕君，在有道不容徼幸。此所以前哲言志，区区其若彼；后贤受禄，振振焉在兹。况如愚臣，本缘末学，粤尘仕路，不弃昌时。暨忝分符，遂更三郡。曹为近辅，非复自桧之讥；鲁并泰山，仍有变齐之旧。至于渦、譙名壤，淮、楚近郊，犹龙之所诞生，真圣是焉临幸。大朝景亳，兼武、汤之上仪；迎年执期，格帝鸿之纯飨。民俗既富，官守维严，岂伊戇愚，猥叨寄任。邈逾涯分，高视曩先。密焉自思，仍有余宠。兽鞶换旧，仅逾期月之淹；隼旆越疆，才倍宿春之费。此盖伏遇皇帝陛下，圣神妙算，睿智极深，廓久照于容光，溥大和于播物。流形品汇，默化陶钧，致是小材，预膺荣遇。谨当布宣诏旨，尽瘁官箴。为身愚谋，虽冀不殆于知止；报国本愿，尚谢余生于自然。誓殒百身，勿渝一志。

知襄州谢上表

刘 攽

脱身谪籍，縶组近藩，仰荷恩华，不任感惧。臣早者滥承人乏，出假使车。材非所长，力不自料。龟勉岁月，孤负选抡。是所谓斗筭之才，何暇论绳墨之外。然惟利术至广，巧者有余。果闻系踵之后人，略取析豪之上第。涇以渭浊，故常畏于后生；李代桃僵，窃自悲于蒲命。遽辱黜幽之典，实由既往之愆。浮舟江湖，托身瘴疠，无复自新之望，长怀永弃之忧。不谓明诏发中，湛恩逮下，俾复乘轩之宠，仍加分虎之荣。情同更生，感惟出涕。此盖伏遇皇帝陛下，离明广照，乾度并容。绍庭之初，方勤心于陟降；思皇之际，亦代匱于细微。以是孱愚，得从甄叙。谨当勉求民瘼，恪佩官箴。犬马之心，以劳力故能有养；桑榆之景，虽已老尚冀无渝。

徐州谢上表

苏 轼

分符高密，已窃名邦；改命东徐，复尘督府。荷恩深厚，抚已兢惭。伏念臣奋身农亩，托迹书林。信道直前，曾无坎井之避；立朝寡助，谁为先后之容？向者屡献瞽言，仰尘圣鉴。岂有意于为异，盖笃信其所闻。顾惭迂阔之言，虽多而无益；惟有朴忠之素，既久而犹坚。远不忘君，未忍改其常度；言之无罪，实深

恃于至仁。知臣者谓臣爱君，不知臣者谓臣多事。空怀此意，谁复见明？伏惟皇帝陛下，日月照临，乾坤覆焘。察孤危之易毁，谅拙直之无他。安全陋躯，畀付善地。民淳讼简，殊无施設之方；食足身闲，仰愧生成之赐。顾力报之无所，怀孤忠而自怜。

徐州贺河平表

苏轼

圣谟独运，天眷莫违，庶邦子来，民罔告病。万杵雷动，役不逾时。遂消东北莫大之忧，然后麦禾可得而食。人无后患，喜若再生。伏以大河为灾，历世所病。禹治袞州之野，十有三载乃同；汉筑宣房之宫，二十余年而定。未有收狂澜于既溃，复故道于将堙，俯仰而成，神速若此！恭惟皇帝陛下，至仁博施，神智无方。达四聪以来众言，广大孝以安宗庙。水当润下，河不溢流。属岁久之无虞，故患生于所忽。方其决也，本吏失其防，而非天意。及其复也，盖天助有德，而非人功。振古所无，溥天同庆。维丰沛之大泽，实汴泗之所钟。伊昔横流，凜孤城之若块；迨兹平定，蔚秋稼以如云。害既广则利多，忧独深而喜倍。虽官守有限，不获趋外庭以称觴，而民意所同，亦能抒下情而作颂。

谢失觉察妖贼放罪表

苏轼

盗发所临，守臣固当重责；罪疑则赦，圣主所以广恩。自惊废逐之余，犹在愍怜之数。伏念臣早蒙殊遇，擢领大邦。上不能以道化民，达忠孝于所部；下不能以刑齐物，消奸宄于未萌。致使妄庸，敢图僭逆。原其不职，夫岂胜诛？况兹沟渎之中，重遇雷霆之谴，无官可削，抚已知危。至于捕斩群盗之功，乃是邻近一夫之力。谨言其始，偶出于臣。虽为国督奸，常怀此志，而因人成事，岂足言劳？勉自列于涓埃，庶少宽于斧钺。岂谓荡然之泽，许以勿推。收惊魄于散亡，假余生之晷刻。退思所自，为幸何多！此盖伏遇皇帝陛下，舞虞舜之干，示人不杀；祝成汤之网，与物求生。其间用刑，本不得已，稍有可赦，无不从宽。务在考实而原情，何尝记过而忘善？益悟向时之所坐，皆是微臣之自贻。感愧终身，论报无地。布衣蔬食，或未死于饥寒；石心木肠，誓不忘于忠义。

谢宣召入院状

苏轼

诏语春温，再命而倮。使华天降，一节以趋。在故事以尝闻，岂平生之敢

望？省循非称，愧汗交深。窃以视草之官，自唐为盛。虽职亲事秘，号为北门学士之荣，而禄薄地寒，至有京兆掾曹之请。岂如圣代，一振儒风，非徒好爵之縻，兼享大烹之养。玉堂赐篆，仰淳化之称文；宝带重金，佩元丰之新渥。既厚其礼，愈难其人。而臣以空疏冗散之材，衰病流离之后，生还万里，坐阅三迁。不缘左右之容，躐处贤豪之上。此盖伏遇皇帝陛下，生资文武，天祚圣神。虽亮阴不言，尚隐高宗之德，而访落求助，已启成王之心。首择辅臣，次求法从。知人材之难得，采虚名而用臣。敢不益励初心，力图后效？才不逮古，虽惭内相之名，志常在民，庶免私人之诮。

谢侍读表

苏轼

北门视草，已叨儒者之极荣；西学上贤，复玷侍臣之高选。省循非称，愧汗交怀。窃惟讲读之臣，止以言语为职，考功课吏，无殿最之可书。陈善闭邪，有膏泽之潜润。岂臣愚陋，亦所克堪？此盖伏遇太皇太后陛下，忧思深长，德业久大。受先帝投艰之托，为神孙经远之谋。故选左右前后之人，罔非吉士，使知兴亡治乱之效，莫若多闻。谓臣虽无大过人之才，知臣粗有不欺君之实，故使朝夕与于讨论。奉永日之清闲，未知所报；毕微生于尽瘁，终致此心。

杭州谢放罪表

苏轼

臣近以法外，刺配本州百姓颜章、颜益二人，上章待罪，奉圣旨特放罪者。职在承宣，当遵三尺之约束；事关利害，辄从一切之便宜。曲荷天慈，不从吏议。伏念臣早缘刚拙，屡致忧虞。用之朝廷，则逆耳之奏形于言；施之郡县，则疾恶之心见于政。虽知难每以为戒，而临事不能自回。苟非日月之明，肝胆必照，则臣丰惟获罪于今日，久已见倾于众言。恭惟皇帝陛下，浚哲生知，清明旁达。委任群下，退托于不能；爱养成材，惟恐其有过。知臣欲去一方之积弊，须除二猾以示民，特屈宪章，以全器使。臣敢不省循过咎，祇服简书。眷此善良，自不犯于汉法。时有贷舍，用益广于尧仁。

又谢太皇太后表

苏轼

乱群之诛，不请而决。盖恩威之无素，致奸猾之敢行。方俟谴诃，岂期宽宥。伏以法吏网密，盖出于近年；守臣权轻，无甚于今日。观祖宗信任之意，以

州郡责成于人。岂有不择师帅之良，但知绳墨之取？若平居仅能守法，则缓急何以使民？顾臣不才，难以议此。恭惟太皇太后陛下，宽仁从众，信顺得天。推一身之至公，纳万方于无罪。而臣始终被遇，中外蒙恩。谓事有专而合宜，情无他而可恕，故加贷舍，以示宠绥。朝廷之明，粗以臣为可信。吏民自服，当不令而率从。

贺驾幸太学表

苏轼

輶回原庙，既崇广孝之风；幄次儒宫，复示右文之化。礼行一日，风动四方。臣闻五学之临，三代所共。盖天子不敢自圣，而盛德必有达尊。在汉永平，始举是礼。虽临雍拜老，有先王之规，而正坐自讲，非人主之事。岂如允哲，退托不能。奠爵伏兴，意默通于先圣；横经问难，言各尽于诸儒。恭惟皇帝陛下，文武宪邦，聪明齐圣。大度同符于艺祖，至仁追配于昭陵，故举旧章，以兴盛节。臣早尘法从，久侍经帟。永矣驰诚，想闻合语于东序；斐然作颂，行观献馘于西戎。

谢赐历日表

苏轼

岁颁正朔，盖《春秋》统始之经；郡赐玺书，亦汉家宽大之诏。实为令典，岂是空文。伏以望岁者，生民之至情；畏天者，人君之大戒。所以常言报应，而不言时数；每奏水旱，而不奏嘉祥。上有销复之心，下有燮调之道。固资共理，同底纯熙。恭惟皇帝陛下，祗敬三灵，忧勤万宇。为仁百世，自然天下之归；教民七年，岂无善人之效？臣敢不仰遵尧典，寅奉夏时？谨堤防沟洫之修，行劳来安定之政。庶殚绵力，少助至仁。

贺立皇后表

苏轼

缙女维莘，伋天之妹，事关庙社，喜溢人神。臣闻三代之兴，皆有内助；二南之化，实本人伦。维《关雎》正始之风，具《既醉》太平之福。民有所恃，邦其永昌！恭惟皇帝陛下，自诚而明，惟睿作圣。辑宁夷夏，德既茂于治朝；辅顺阴阳，政兼修于内职。既膺大庆，益广至仁。下逮海隅，夫妇无有愁叹；上符天造，日月为之光明。受禄无疆，与民同乐。